

# Dus onns peda per la materia dad in onn

Il cussegl grond s'exprima cleramain a favur da la classa d'introducziun.

■ **(anr/ac) La reintroducziun da la classa d'introducziun n'è betg stada dispitaivla, ni da la vart da la regenza ni da la vart dal cussegl grond. Deputadas e deputads han preferì la mesemna passada la varianta da Bruno Claus (pld, Cuira) ed approvà l'incumbensa cun 113 gea cunter 1 na.** Sulet laud vers la classa d'introducziun è stà d'udir la mesemna passada en il cussegl grond enaquella che l'incumbensa da *Bruno Claus* è vegnida tractandada. E gist cun la finamira d'introducìr la classa d'introducziun han il deputà e ses cunsegnaders lantschè l'incumbensa. Per dapli temp a favur da l'uffant ha l'autur da la incumbensa, Bruno Claus, pledà per la classa d'introducziun che lubescha al scolar a la sava da la scola populara da sa fatschentar durant dus onns cun la materia da scola da l'emprima classa. Uschia sappi quest uffant sa scolar conform a sias abilitads e possa silsuenter per regla suandar a la scolaziun en las ulteriuras classas senza gronda fadia e senza ulteriur sustegn da la pedagogia speciala. *Elita Florin* (pcd, Razén) ha titulà per sbagl cumplet da stgassar la classa d'introducziun en connex cun la revisiun da la lescha da scola. La furma integrativa na possa betg remplazzar la classa d'introducziun ed i saja da dar il spazi ed il temp necessari a scolaras e scolaras che dovrian quest temp per mancanza da madirezza. *Elisabeth Mani* (pbd, Tavau) ha medemamain discurrì d'in model da success en connex cun la classa d'introducziun e d'ina schanza manchentada en la cumissiun deliberanta da la revisiun da la lescha da scola da

betg sustegnair ina proposta minoritara da salvar la classa d'introducziun. Sustegn ha l'idea da reintroducìr la classa d'introducziun en il chantun grischun chattà tar la deputada *Sandra Locher* (ps, Cuira). Ella ha fatg attent a las differenzas da svilup dals uffants en la vegliadetgna da l'en-tschatta da scola. I saja l'incumbensa da la lescha da scola e dals purtaders da la scola da poscher l'instrumentari necessari per possibilitar in svilup adattà a scolaras e scolaras e quai saja pussaivel en quella fasa. Sandra Locher ha fatg attent che la lescha actuala lubeschia gia ussa a las vischnancas e purtaders da scola d'introducìr talas classas uschia che l'incumbensa Claus saja da surdar a la regenza en il senn da lezza. E per quella

regenza ha pledà il cusseglier guvernativ Martin Jäger che ha exprimì sia simpatia per l'incumbensa ed il plaschair da la concordanza dals peds a favur da la classa d'introducziun cun sia intenziun persunala. La differenza tranter incumbensa e la voluntad da la regenza ha el titulà per minima ed supplitgà il cussegl gronda da suandar a la proposta da la regenza. Ina supplitga ch'il cussegl n'è betg suandà. El ha dà la preferentscha a la varianta da l'incumbensa cun 96 cunter 18 vuschs ed ha approvà la finfinala l'incumbensa Claus cun 113 cunter 1 vusch. Las vischnancas ed il purtaders da scola re-tschaivan ussa la pussaivladad da manar ina classa d'introducziun.



Per sia incumbensa da reintroducìr classas d'introducziun ha deputà Bruno Claus (pld Cuira) retschavi il sustegn quasi unanim da sias collegas e da ses collegas. FOTO O. ITEM